



Հակոբ Պարոնյան

Ազգային շոշեր

ՅՈՎՀԱՆՆԵՍ ՏԷՐՈՅԵՆՑ

Յովհաննէս Տէր ոյենց կամ Յովհաննէս պատուելի կամ Պրուսացի Յովհաննէս կամ Յովհաննէս Տէր Կարապետեան կամ Չամուրճեան Յովհաննէս, օգնական Պետրոս Առաքեալին, աստուածաբան, մատենագիր, փաստաբան դէտերու, լեզուագէտ, մաթեմաթիկոս, խմբագիր, դասատու, կրիտիկոս, ծնած է անցեալ դարուն վերջերը, Պրուսիայի գիղերէն մէկուն մէջ: Իւր ծննդեան հետեւեալ գիշերը ծնան դէտերն, որոնց գոյութիւնն այն թուականէն ի վեր հաստատուած ճշմարտութիւն մ'է:

Թուաբանական հաշուով պարտ էր իրեն կիրակի օր մը գալ աշխարհ, բայց ջերմեռանդ եւ բարեպաշտ ըլլալով ուզեց սուրբ պահել հանգստեան օրն եւ, այս պատճառով, քսանչորս ժամ երկարած գելով իւր ծնունդն, հետեւեալ օրը բարեհաճեցաւ ի լոյս գալ: Ականատես եւ հաւատարիմ պատմագիրներ կ'աւանդեն, թէ երբ մայրն եկեղեցի կ'երթար իւր սովորական աղօթքն ընելու՝ ինքն ալ մօրն արգանդին մէջ երկրպագու կ'ըլլար Պետրոս առաքեալին պատկերին: Ոմանք այս աւանդութիւնը կը հաստատեն, պատմելով թէ՛ ամէն անգամ, որ դիպուածով այս առաքեալին խօսքը կը բացուէր, մօրը ցաւը կը բռնէր եւ որ չէր անցնէր մինչեւ որ եկեղեցին չերթար եւ այն պատկերէն կտոր մը... չուտէր: Դրացի կիներու այն գուշակութիւններն, որովք կը մարգարէանային յայտնելով իւր մօրը, թէ տղադ կամ ձկնորս պիտի ըլլայ կամ ուրացող, լիովին կը վաւերացունեն պատմագիրներուն խօսքերուն ստուգութիւնը: Տէրոյենցի բարեպաշտութիւնը այսօր առած դարձած է, վկայութիւններու կարօտութիւն

չունի: Ծնած օրէն սկսաւ պահեցողութեան. չորեքշաբթի եւ ուրբաթ օրերը, երբ մայրն ծիծն անոր բերանը կը դնէր, Տէրոյնց կը մերժէր, նետելով իր մօրը վրայ այնպիսի նայուածք մը՝ որ կը թարգմանուէր, ինչու կը ստիպես զիս պահքս արել, մայրիկ, այս թարգմանութեան ճշտութեանը կը վկայենք, որովհետեւ Տէրոյնցինը չէ: Ծոմապահութեամբ ալ ոչ նուազ նշանատր է Պատուելին. եթէ այսօր դասատու մը կամ խմբագիր մը դրամ չունենայ հաց առնելու եւ մինչեւ իրիկուն անօթի մնալ ստիպուի՝ Տէրոյնցի պէս բարեպաշտ է, կ'ըսեն:

Չամորճեան Պրուսա անցուց իր մանկութեան եւ պատանեկութեան օրերը: Ամէն առաւօտ կանուխ եկեղեցի կ'երթար: Իր աղօթքին մէջ թէպէտեւ երկնից արքայութիւնը կը խնդրէր, սակայն հարուստ ամիրաներ ալ խնդրելու չէր մոռնար: Նեղութեան ժամանակները կը ստիպուէր երբեմն մարդու սխալական ըլլալը հաստատել, ըսելով, արքայութիւն խնդրենք, բայց հացագործը դրամ կ'ուզէ, ամիրաներ տուր ինձի, Աստուած, եւ ամէն բան ունեցած կ'ըլլամ: Աղօթքն աւարտելէն ետքը՝ շապիկ կը հագնէր ու ձայնատրութիւն կ'ընէր: Ձայնն այնչափ բարձր էր, որչափ իր ոճը, այնչափ անուշ, որչափ իր յօդուածները եւ այնչափ բարակ, որչափ «Երեւակին» թուղթը:

1832-ին Պոլիս եկաւ Տէր-Կարապետեան իր ձեռքն ունենալով պայուսակ մը, որ կը պարունակէր չորս շապիկ, վեց վարտիք, քանի մը հայերէն գրքեր, քիչ մը գրպարտութիւն, ծրար մը կոհի, չորս թաշկինակ, կտոր մը պանիր, եւ կտոր մ'ալ վեհանձնութիւն: Ասոնցմով կրնամ, կ'ըսէր, քիչ մը ժամանակ ապրիլ: Արդարեւ երեք չորս ամսի չափ Պոլսոյ փողոցները քննելէն ետքը, ներկայացաւ Յովհաննէս Գալֆային, որ իր գաւակներուն եւ աղքատներուն համար մասնատր վարժարան մը բացած էր Իճատիէ, զոր քանի մը տարի առաջ Միսաքեան Խաչատուր, երեւելի գրագէտ, Հնարաւանի փոխեց գրականութեան փոքրիկ ծառայութիւն մը մատուցանելու նպատակով: Այս վարժարանին դասատու-տնօրէնութիւնը ստանձնեց Չամորճեան: Նախ աշակերտներուն սկսաւ սորվեցնել, թէ ի՛նչ գիրք առնելու է մէկն աղօթելու ժամանակ, թէ ինչ զգուշութեամբ ծռելու եւ գետինը համբուրելու է մէկը գայթակղութեան տեղի շտալու համար, եւ այս ուսումն կամ գիտութիւնը լաւ տպատրելու համար աշակերտներուն... ծունկերուն մէջ, առաւօտէ մինչեւ երեկոյ այնչափ երկրպագութիւն ընել կու տար, որ խեղճերուն բանթալոններուն ծունկերը երկու օրը անգամ մը կը բացուէին: Աշակերտներուն

Ծնողքը տեսնելով իրաց վիճակը, կաշիի կտոր մը կարեցին բանթալոն ներուն ծնկներուն վրայ: Աս աս օգուտ չըրաւ, եւ աշակերտներն սկսան իրենց բանթալոն ը վեր առնելով աղօթք ընել: Աս աս շյաշողուեցաւ եւ վերջապէս որոշուեցաւ, որ աշակերտներն իրենց բանթալոն ը հանեն եւ այնպէս աղօթեն: Այս եղանակաւ քանի մը տարուան մէջ աղօթք ընելու գիտութիւնն անոնց սորվեցունելէն ետքը, սկսաւ դասախօսել այն բաներու վրայ, զորս չէր գիտեր: Այո՛, չէր գիտեր, բայց սորվելու մեծ փափաք ունէր: Ինքը ժամանակին յարգը լաւ գիտէր. ինքնիրմէ կ'աշխատէր գիշեր ցերեկ եւ անշուշտ այս անդու աշխատութեան շնորհիւն է, որ այսօր բաւական լեզուներ գիտէ, կ'ըսեն: Եթէ այսօր լեզուները խառնելու պէտքն զգացուի՝ կարծենք իրմէ աւելի արժանատր եւ յաջողակ մէկը չպիտի կրնան գտնել: Երբ այդ աշակերտները եկեղեցի կ'երթային եւ դասուն ետեր շարուելով երկրպագութիւն կ'ընէին՝ ժողովուրդը կ'ըսէր, ապրին, ապրին, ի՛նչ ուսումնական տղաներ, եւ Չամուրճեան ինզինքը փառաւորուած կը կարծէր ազգին այսպիսի ծունկ չորոյ աշակերտներ հասցնելուն վրայ:

1838-ին աղաշուեցաւ ճեմարան մտնել իբրեւ փորձառու եւ իբրեւ ուսումնապետ: Հոն մտնելուն հետեւեալ օրը ծրագիր մը պատրաստեց եւ սկսաւ գործադրել: Այս ծրագրով աշակերտ մը ինը տարուան մէջ պիտի սորվէր հայերէն լեզուն այսպէս.

Երեք տարի քերականութիւն.

Երեք տարի ճարտասանութիւն.

Երեք տարի տրամաբանութիւն.

Քերականութիւնն աս երեք տարիի բաժնեց.

Մասն առաջին՝ բառագիտութիւն.

Մասն երկրորդ՝ զուգադրութիւն,

Մասն երրորդ՝ շարադրութիւն:

Այս քերականութեան վերջին երկու մասերը արժանի չեղան լոյս տեսնելու, բայց առաջինը մեծ, խիստ մեծ ընդունելութիւն գտաւ... նպարավաճառներէն, որոնք

յիշեալ քերականութեամբ սորվեցան, թէ ինչպէս պանիր կը փաթտուի թուղթերու մէջ: Խօսքին ուրը մասերուն մէջ զգալի փոփոխութիւններ ըրաւ. Անունին պաշտօնը Մակբային տուաւ, Մակբայինը Դերանունին, Դերանունն պաշտօնը Շաղկապին, եւ այնպէս վարուելով բարեկարգեց Հայաստանը...

Քերականութիւնն ըսել պիտի ուզէի: Վարժարանին յառաջադէմ աշակերտները սկսած էին այն քերականութեամբ սխալ խօսելու եւ սխալ գրելու վարժուիլ, երբ անոնցմէ մին անոր սխալները Պատուելիին ցոյց տուաւ: Այն օրէն ետքը յիշեալ Քերականութիւնն իբրեւ վարժութիւն տրուեցաւ աշակերտներուն, որ մէջի սխալներն ուղղելով կանոններուն համեմատ գրեն: Պատուելին հոն ալ չկրցաւ երկար ատեն մնալ, վասն զի ճեմարանը գոցուեցաւ:

1846-ին լրագրական ասպարէզին դուռը բաց գտնելով ներս մտաւ: Թուղթ մը գտաւ, առաւ եւ վրան Հայաստան գրեց Քիրտստանը ըսէ, Քիրտստան, կը պոռայ Սըր Լեյրըտ, եւ սկսաւ հրատարակել: Հայաստան ով սկսաւ Հռովմի գահը գովաբանել, որով քիչ ժամանակի մէջ այնպիսի ջարդ մը տուաւ ընթերցողներուն, որ իրմէ գատ Հայաստան կարդացող չմնաց:

1848-ին տեսնուելու բարեբախտութիւն ունեցաւ Ֆերիերի կարդինալին հետ, որ Հռովմէն հոս դրկուած էր մոլորեալ եւ հերետիկոս քրիստոնեաները համոզել, որ ս. պապին հողաթափը համբուրեն: Սկսաւ պատմել Տերոյենց, թէ՛ ինչպէս եղեր է, որ նատուրա բառը նաշերէ էն ելած եւ, թէ՛ բրոշետերէ բառը բրո եւ շետերէ բառերէ ծնած է բրո Էրիկն, իսկ շետերէ կնիկն անշուշտ թէ՛ բուրկատորիում բուրկա բառէն կ'ելնէ բուրկատին ալ մոռանալու չէ թէ հայերը Քրիստոսի վրայ երկու նատուրա չեն ճանչնար, թէ՛ Հոգւոյն Սրբոյ համար միայն ի Հօրէ բրոշետիդ կ'ըսեն, թէ ի Հոգւոյ բրոշետիդ ըսելը չեն ընդունիր հայերը, թէ՛ Հայաստանեայց եկեղեցւոյ դաւանանքը Հռովմայեցւոց պէս է, եւ թէ՛ հայերը Հռովմայ նախագահութիւնը կ'ընդունին եւ կը փափաքին, որ սէր եւ միութիւն հաստատեն Հռովմայ արքոյն հետ: Չամորճեան՝ Հասունի պէս ափ մը հայ չէր ուզեր արքայութիւն տանիլ, այլ կը փափաքէր, որ բոլոր հայերն մէկէն տանի արքայութիւն Հռովմի ճամբով: Սակայն շյաջողեցաւ, եւ եթէ այսօր հայերը դժոխք երթան՝ Պատուելին յանդիմանելու իրաւունք չունին:

1857-ին սկսաւ Երեւակ անունով տխուր հանդէս մը հրատարակել: Օր չէր անցներ, որ հասն երեք անգամ շխօսէր հոն: Դեւերու գոյութիւնը ուրացողները հերետիկոս կը հռչակուէին, եւ ինք ամէն ճիգ կը թափէր դեւերու գոյութիւնն հաստատել իւր գոյութեամբը, եւ, որ զարմանալին է, դատը միշտ կը վաստկէր: Հռովմայ եկեղեցոյն դէմ խօսողները ազգին մէջ բողոքականութիւն տարածելու գրպարտութեան կը մատնուէին: Այն ատենները Մասիս, Մանգումէ եւ Մեղու, որք բաժանորդ չէին Երեւակին ... կարծիքներուն, անդադար անոր դէմ կը խօսէին:

1864 մարտ 16-ին Չամուրճեան ելաւ Մասիսի խմբագրապետին դէմ դատ բացաւ: Այս դատին համառօտ արձանագրութիւնը հոս կը հրատարակենք ի գուարճութիւն մեր ընթերցողներու:

Սրբագան պատրիարք. Դուք երկուքդ ալ Հայաստանեայց եկեղեցոյ զաւակ ըլլալով ի՞նչ է պատճառն, որ քանի մը ատենէ ի վեր ձեր մէջը անհամաձայնութիւն մը կը տիրէ:

Տէրոյենց. Ես անոր անձին հետ գործ չունիմ, սրբագա՛ն:

Ուրուճեան. Ես ալ չունիմ:

Տէրոյենց. Ամէն թերթի մէջ ինձի կ'անպատուէ:

Ուրուճեան. Սուտ է, ես բնաւ անպատուած չեմ զինքը, ես ճշմարտութիւնը կը գրեմ, ինքն է, որ կ'անպատուէ զիս դոճամիջեան հերետիկոս անուանելով:

Սրբագան պատրիարք. Ինչո՞ւ անանկ բաներ կը գրես, պատուելի:

Տէրոյենց. Որովհետեւ Նալբանդեանն ալ դոճամիջեան է եւ այս Նալբանդեանը համարձակեցաւ օր մը դիւաց գոյութիւնը ուրանալ:

Տ. Չ. Հիւնքեարպէյենտեան. Ատկէ բոլոր դոճամիջեաններուն հերետիկոս ըլլալը կը հետեւի՞:

Տէրոյենց. Չհետեւի՞ր մի ես:

Ութուճեան. Միշտ պապականութիւնը կը պաշտպանէ, եւ երբ Հայաստանեայց եկեղեցոյ դէմ յարձակում տեսնէ՝ ձայն չհաներ:

Տէրոյենց. Հայաստանեայց եկեղեցին պաշտպանութեան պէտք չունի:

Սրբազան պատրիարք. Պատուելին ասկեց վերջը Հայաստանեայց եկեղեցին պաշտպանելով այս արատն վրայէն կը ջնջէ:

Տէրոյենց. Կը պաշտպանեն. բայց նախ պատիւ տեղը բերէք:

Հիւնքեարպէյենտեան. Սակարկութի՞ւն կ'ընէք. Պատուելի:

Տէրոյենց. Ի՞նչ իրաւունքով ինձի եօթանասնամեայ ըսած է Մասիսի մէջ:

Ութուճեան. Եթէ եօթանասնամեայ ըսած ըլլալուս համար հերետիկոս եղած կ'ըլլամ, բուն տարիքդ գրուցէ, շաբաթ ատուր Մասիսին մէջ հրատարակեմ:

Տէրոյենց. Միշտ կ'անպատուէ գիս:

Ութուճեան. Քաւ լիցի. ես խղճի ազատութիւնը կը յարգեմ: Եթէ Պատուելին խոստովանի թէ պապական է, այն ատեն բան մը չեմ ըսեր...

Տէրոյենց. Եկեղեցին չընդունիր խղճի ազատութիւն:

Սրբազան պատրիարք. Հաշտուեցէք:

Ութուճեան. Ես անոր անձին հետ գործ չունիմ. առէք Մասիսը եւ հաշտեցուցէք, եթէ կրնաք, Երեւակի հետ:

Սրբազան պատրիարք. Ի՞նչ կ'ըսէ, Պատուելի՛:

Տէրոյենց. Հերետիկոսութիւն չընեն, որ ես ալ չգրեմ:

Տէրոյենց պատուելին Ութուճեանի ճակատէն համբուրելով կէս հաշտութեամբ տուն կը դառնայ: Քանի մը ամիս ետքը այնչափ ջերմ եռանդով կը սկսի ջատագովել պապականութիւնն, որ Մոնտ անուն անդրալեռնական լրագիրն

1864 դեկտեմբերի 12 թերթին մէջ հետեւեալը կը հրատարակէր.

«Կ. Պոլսոյ մէջ Երեւակ շաբաթական թերթ մը, չմիացեալ Հայոց ամենէն ներհուն եւ ամենէն լուրջ անձէն խմբագրեալ, գանոնք իրենց հոռովմէական եղբայրներէն բաժնող նախապաշարմանց եւ կանխակալ կարծեաց միջնորմը խրամատեց... իւր գէնքերը Հոռովմայ գինանշանները կը կրեն...»:

Խոստովանիմ եւ հաւատամ:

Խոռվութի՞ւն ամենեցուն:

Երեւակին երկրպագեսցուր:

Այս է ահա Պատուելիին խմբագրական կեանքը: Իւր շնորհիւ, ազգային լրագրական ասպարէզն տղայական եւ անօգուտ վիճաբանութիւններու թատրոն հանդիսացաւ: Երբ հայ թերթ մը փափաքէր քիչ մը լոյս վառել, Պատուելին կու գար, կը փշէր գայն: Մինչեւ այսօր երբ կրօնի խնդիր մը ծագի՝ Պատուելին առանց հրաւերի սպասելու ասպարէզ կը նետուի եւ նկատելով, որ բողոքականութիւնը ազգին մէջ տարածելու ջանքեր կ'ըլլան -ով սկիզբ կու տայ իւր յօդուածներուն, որոնց վերջ կը մաղթենք մեր բոլոր սրտով:

Բայց պատուելիին աղօթքներն ընդունելի եղած էին. գրեթէ միշտ Ամիրա մը գտնուած էր իրեն ձեռնառու: 1865-ին Կարապետ Ամիրա նուիրեց Երուսաղէմին գումար մը, որուն տոկոսը, տասը ոսկի օսմանեան, Պատուելիին կը տրուի ի վարձատրութիւն Եկեղեցական պատմութեան մը, գոր պիտի գրէ Չամուրճին: Այս աշխատասիրութիւնը դեռ ի լոյս չեկաւ եւ գալու պատճառ մը չունի. վասն զի Պատմութիւնը գալուն պէս Պատուելիին տասը ոսկին պիտի երթայ: Տարակոյս չկայ, թէ կարելի եղածին չափ ընդարձակել պիտի ջանայ պատուելին այս Պատմութիւնը:

Բացի Չոհալ եւ Երեւակ հանդէսներէն՝ քանի մը գիրքեր գրած ու թարգմանած է: Բասգալա Խորհրդածութիւնքն երեւելի տեղ մը բռնած է այսօր թարգմանութիւններու մէջ իւր... սխալներովը: Այս գիրքն աշտարակաշինութեան ժամանակ թարգմանուած ըլլալուն պատճառաւ է, որ Բասգալին ըսածը սխալ

հասկցած է Պատուելին, թեպետեի ինքը կը պնդէ, որ շատ հաւատարիմ գտնուած է թարգմանութեանը մէջ, եւ եթէ տեղ տեղ սխալ թարգմանուած է՝ պատճառն այն է, որ բնագիրն սխալ գրուած է: Խորհուրդ Գաղտնի ընկերութեանց, որ դարձեալ անդրալեռնականութիւն կը հոտի եւ գլխու ցաւ կը պատճառէ:

Քաղաքավարութիւն, ուսկից բնաւ օգուտ քաղած չեն Երեւակի եւ Չոհալի յօղուածները:

1871-ին երեսփոխանական ժողովոյ անդամ ընտրուեցաւ, բայց ինքը մերժեց, առարկելով՝ թէ մեղք կը համարէր կիրակի օրերը ազգին բարիք ընելը: Չմոռնանք ըսել թէ՝ կիրակի օրը աղքատին ողորմութիւն ալ չտար:

Պատուելին իւր սուր յիշողութեան շնորհիւ կրօնի մասին ընդարձակ տեղեկութիւններ հաւաքած է գլխուն մէջ: Լաւ հեզնել գիտէ: Օր մը Իսկիւտար ս. Կարապետ եկեղեցոյն մէջ տաղտկալի քարոզի մը ունկնդիր ըլլալէն ետքը դուրս ելաւ եկեղեցիէն ըսելով.

«Գաւազանը ասանկ մարդերու ձեռք տալու տեղ՝ կոնակը տալու է»:

Տրամաբանելու մեծ յաջողութիւն ունի. եւ եթէ հաճի օր մը, գոնէ օր մը, արդար դատի մը պաշտպան կանգնիլ, ակներեւ պիտի երեւի, որ գինքը գերազանցող չկայ այս ճիւղին մէջ: Տիեզերական Պատմութեան ալ օտար չէ, եւ առանց ճակատը շփելու ծանօթութիւններ կու տայ այն ամէն անձերու վրայ՝ որոնց գործերը, քանի՛րորդ դարուն մէջ եկած ըլլալը, ե՛րբ մեռնիլը, դդումը միտով թէ ձեռով ուտելը, առաւօտները կաթ թէ խահուէ խմելը, շաբաթը քանի՛ անգամ ածիլուիլը, կատու թէ շուն սիրելը կ'ուզես իմանալ: Ամէնէն նշանաւոր հեղինակներուն գործերն ուշի ուշով կարդացած եւ ըղեղին մէկ անկիւնը գետեղած է:

Այն համբան, որ կը վայլէ եւ որ այնքան կը վայլէ իրեն՝ որքան իւր երկար վերարկուն, շատերու փափաք կը ներշնչէ անգամ մը գոնէ տեսնել այս մարդն, որ հրապարակի վրայ անգամ գոռում գոչում կ'ընէ: Ինչպէս ժամանակով Աղեքսանդր Դիոզինէսն, այնպէս ալ երբեմն ամիրաները պատուելին տեսնելու կ'երթային. եւ երբ առաջարկէին իրեն խնդրէ մեզմէ ինչ որ կ'ուզես, Պատուելին կը պատասխանէր. կը խնդրեմ որ դրամ տաք ինձի: Ամիրաներն այս ազատ եւ

հանճարեղ պատասխանին վրայ հիանալով, կը քաջալերէին զինքը ոսկիներով, գորս անձնուիրաբար կ'առնէր Պատուելին... կիրակի օրերը, եւ այդ գումարներով Հայաստանեայց եկեղեցին կը պաշտպանէր:

Տէր-Կարապետեան սովորական կերպով չնստիր իր սենեակին պատուհանին առջեւ: Եթէ փողոցը նայիլ հարկ ըլլայ՝ մեզի պէս գլուխը պատուհանէն դուրս շհաներ, այլ ոտները: Շատ անգամ զարմացած են, թէ ի'նչպէս կրնայ տեսնիլ ոտներովը, մանաւանդ թէ անոնց վրայ ակնոց ալ չէր դնէր: Ոտներէն մէկուն մատներէն անցած է իր ծխափայտն, որ կարգելու իրեն գուլպայ հագնիլը: Եթէ հարկ ըլլայ իրեն յօդուած մը գրել կրօնի վրայ, կ'երթայ գրասեղանին առջեւ, որուն վրայ միշտ անպակաս է գրիչ, մելան, ածուխ. վայրկեան մը կը խորհի եւ կը սկսի գրել: Գրութիւնն ասարտելուն պէս, կ'երթայ բազմոցին վրայ կ'երկննայ եւ գիրք մը առնելով կը կարդայ: Բարեկամ չունի... բացի գիրքերէն՝ որոնց իրաքանջիւրն իր տեսակին համեմատ շարած է մատենադարաններու մէջ:

Պատուելին վարդապետութիւններն հետեւեալներն ըլլալու են.

Պէտք է մարդերն իրենց խօսքերէն դատել եւ ոչ գործերէն, եւ երբ մէկն ըսէ մեզ, թէ ես վաճառական եմ եւ երթայ լեռներն ասագակութիւն ընէ, պարտաւոր ենք զայն իբրեւ պատուաւոր վաճառական յարգել. վասն զի բերանը սրտին թարգմանն է:

Ժամանակին յարմարիլը փոքր մարդերու գործ է, մեծ մարդն այն է, որ գիտէ ժամանակն իրեն յարմարցնել. վասն զի հագուստը պարտաւոր է մարդուս յարմարիլ եւ ոչ թէ մարդս հագուստին:

Լաւ է սրբազան պապին ոտները համբուրել, քան Էջմիածնայ եպիսկոպոսներուն ձեռները:

Ոչ թէ ժամանակն, այլ դրամն է, որ կը փոխէ ամէն բան:

Երբ ճամբայ մը բռնեցիր՝ շարունակէ զայն, եթէ սխալ ալ ըլլայ:

Պատուելին պարզասէր է... հագուստի մասին, սխալ չհասկցուի: Օր մը երբեք մտքէն անցուցած չէ նեղ կօշիկներու մէջ շարձարել իր ոտները. այնչափ մեծ եւ

ընդարձակ են իր ոտքի ամաններն՝ որոնց մէկ հատը միայն կրնայ երկու հոգի միանգամայն հագնիլ եւ առանց նեղութիւն իմանալու քայլել: Երկար վերարկու մը կ'առնէ երբեմն իր վրայ, ինչպէս երբեմն՝ վրան առաւ ճեմարանի ուսումնասպետութեան պաշտօնը... ուրիշ մը եթէ վրայէն քաշէ առնէ վերարկուն՝ ինքը չիմանար: Կեանքին մէջ երբեք փողպատ եւ ողջմտութիւն գործածած չունի. ոչ թէ չունենալուն համար, այլ ինքզինք նեղութեան հպատակ չընելու համար. բանթալոնն շատ ընդարձակ է, հակառակ այն անհիմն գրոյցներուն՝ որովք շատերը կ'ուզեն հաւատացնել թէ՛ իր եկեղեցական պատմութիւնն աւելի ընդարձակ է:

Չամուրճեան հասակով եւ կզակով երկար, համբաւով եւ քիթով մեծ, գոյնով եւ մագերով ճերմակ, աչքով կապոյտ, քաշառողջ մարդ մ'է: Ճակատն այնքան խորշոմ ունի, որ արդուկն անգամ բաւական չէ շտկել գայն: Մատներն երկար են եւ աստուածաբանութիւն գրելու կոշում ունին: Ուզած ժամանակը ձայնն այնքան հաստ կը հանէ, որ որոտման կարծիքը կու տայ լսողներուն:

Չամուրճեան կը նկարագրուի գետինը պատկած կոնակի վրայ եւ գիրք մը բռնած: Ճակատին վրայ մեծ տատերով վիմագրուած է կրօնք: Դեւերու խումբ մը շրջապատած են զինք եւ զինեալ են զէնքերով, որոց վրայ գրապարտութիւն դրոշմուած է: Քթին վրայ միշտ կը բզգայ մեղու մը եւ երբեմն կը խայթէ: Մասիս Արեւելեան մամուլ անոր վերարկուէն կը քաշեն: Քարաքաշեան կը ներկայացնէ իրեն տղու խաղալիք մը, որուն վրայ գրուած է կրօնական դրութիւն: Քովը գետնի վրայ փռուած է աքաղաղ մը, որ իրեն համար գոհուած է երեք անգամէն աւելի խօսած չըլլալուն համար: Քանի մը հոգիներ Պատուելիին գլխուն վերը կայնած փրցունել կ'աշխատին այն պսակը, զոր նուիրած էր իրեն երբեմն պատրիարքարանի հաւատաքննութեան սուրբ ատեանը: Եւ Պատուելին իրեն շուրջը գտնուողներուն այս հեզնութիւնները տեսնելով կը դառնայ անոնց կը նայի այնպիսի դէմքով մը, զոր մենք կ'ունենանք երբ տասնչորս տրամ անգլիական աղճուրի մէջ հայեցնելով խմենք: